



Poziv za dostavljanje nominacija za lokalne heroje i heroine mira

USAID-ov projekat PRO-Budućnost u partnerstvu sa Mrežom za izgradnju mira pokreće inicijativu za prepoznavanje i odavanje počasti pojedincima i pojedinkama u lokalnim zajednicama čija djela promovišu mir i solidarnost, građansku odgovornost i temeljna ljudska prava.

Cilj inicijative je odavanje počasti dobrim i hrabrim ljudima koji su u ratnim i poratnim vremenima, uključujući naše savremenike/ce, prevazilazili etničke granice, nerijetko stavljajući i život na kocku, i nailazili na osude vlastitog naroda, samo da bi pomogli drugom čovjeku bez obzira na to kako se zove, odakle dolazi i kojem narodu pripada.

Kroz priče o lokalnim herojima i heroinama želimo doprinijeti dekonstrukciji monolitnih kultura sjećanja, i ponuditi drugačije viđenje politike i naše prošlosti, koje će u prvi plan stavljati ljudskost, građansku hrabrost, odgovornost i solidarnost.

Lokalni heroji i heroine mira mogu biti ljudi iz rata koji su dali ili rizikovali svoj život za nekoga ko je u tom trenutku bio ugrožen, samo zato što se drugačije zvao, bio druge nacije i vjere ili drugačije mislio.

To mogu biti ljudi koji se danas bore za ljudska prava i nesebično pomažu druge i drugačije bez obzira na to ko su oni. Heroji i heroine mogu biti iz svih oblasti života, kulture, sporta, politike i biznisa, doktori/ce, humanitarni radnici/e, predstavnici/e nevladinih organizacija, vjerski lideri/ce i dr.

Lokalni heroji ne moraju biti žive osobe.

Inicijativa o lokalnim herojima i heroinama mira se naslanja na novinarsku nagradu "Srđan Aleksić", koju Mreža za izgradnju mira već pet godina dodjeljuje novinarima i novinarkama za profesionalno i odgovorno izvještavanje o marginalizovanim grupama, ljudskim pravima, promociju mira, te se zalažu za društvenu hrabrost i odgovornost.

Srđan Aleksić, je mladić iz Trebinja koji je dao život spašavajući svog sugrađanina Alena Glavovića, napadnutog od strane vojnika samo zato što je bio drugačiji. Zahvaljujući Srđanu Alenu je preživio i svake godine dolazi iz Švedske na Srđanov grob, a po hrabrom Trebinjcu dao je ime svome sinu. Srđan Aleksić je prepoznat kao istinski heroj, nekoliko gradova je imenovalo ulice po njemu, snimljen je film "Krugovi", te je danas inspiracija aktivistima/kinjama, umjetnicima/ama i mnogim drugima.

Vjerujući da u svakoj lokalnoj zajednici postoje osobe poput Srđana Aleksića, koji su pokazali ljudskost u najtežim vremenima i koji je i danas pokazuju, projekat PRO-Budućnost ih ovom inicijativom želi javno prepoznati i veličati.

Kriterijumi

Prijedlog za lokalne heroje i heroine mogu poslati članovi/ice Radnih grupa u PRO-Budućnost projektu, nevladine organizacije, neformalne grupe pojedinaca i pojedinki, škole, vjerske organizacije i druge institucije na lokalnom nivou, i to najkasnije do **1. maja/svibnja 2016. godine.**

- obrazloženje do 500 riječi kucanog teksta
- najmanje dva svjedočenja ili preporuke koje će potkrijepiti prijedlog
- pisani dokumenti, novinski članci ili drugi medijski zapisi koji govore o lokalnom heroju ili heroini (ukoliko postoje)

Prijedlog treba da sadrži i način ili načine promocije heroja i heroina u lokalnoj zajednici. Inicijative koje budu prošle stručnu komisiju biće finansirane ili sufinansirane u iznosu do 500KM.

O prijedlozima će odlučivati stručna komisija koja će zaprimati prijedloge i vršiti provjeru predloženih kandidata/kinja.

Nominacije slati na e-mail herojiheroine@hcabl.org, ujedno sa skeniranom popratnom dokumentacijom. Alternativno, obrazac za nominaciju i popratnu dokumentaciju moguće je poslati i poštom na adresu:

Nominacija za Lokalne heroje i heroine
Projekat Pro-Budućnost
Helsinški parlament građana Banjaluka (Mreža za izgradnju mira)
Miše Stupara 68
78 000 Banjaluka

Projekat PRO-Budućnost (Povjerenje, Razumijevanje, Odgovornost za Budućnost) Američke agencije za međunarodni razvoj (USAID) implementira Catholic Relief Services u saradnji sa Fondacijom Mozaik, Caritasom BK BiH, Forumom građana Tuzle, Helsinškim parlamentom građana Banja Luka i Međureligijskim vijećem u BiH.